

四庫全書

經部

欽定四庫全書

經部

四書管窺卷三

四

詳校官給事中臣丁雲錦

刑部郎中臣許兆椿覆勘

總校官進士臣朱銓

校對官編修臣邱庭澧

謄錄監生臣汪名達

欽定四庫全書

四書管窺卷三

元 史伯璿 撰

論語

雍也

雍也南面章 饒氏謂伯子不衣冠而處則非可使南面者夫子豈得遽以此許之恐不當以此為說集註初依古註作兩章後合為一章要之只作兩章為是又謂

使夫子果許仲弓伯子可使南面則兩箇可字不當以一為適可一為僅可以此觀之可也之可決非可使南面之謂

按仲弓以臨其民之言若不承南面之意則無所因然則謂可也決非可使南面之謂無乃不審仲弓所言之意乎上言南面下言臨民合為一章何疑之有況可使可也詞氣之間自有輕重正不害其為不同也

通謂居敬是誠意正心修身事行簡是齊家治國平天下事

按朱子曰范氏謂敬以直內簡以臨民故堯舜修己以敬而臨下以簡恐敬簡不可太分說居字只訓主字若以為主於敬而行之簡則可以為居則敬而行則簡則不可若分修己臨下則恐分了仲弓不應於下文又總說以臨其民也今詳通說正如范氏之意恐與朱子所見不合不知如何

顏子不遷怒章 攷證顏子未當事權有何可怒蓋借
是以諫曉哀公也哀公為人躁妄故夫子舉顏子不遷
怒貳過為哀公對病之藥

七情人所必有唯怒最為易發而難制曾謂未當事
權者皆無可怒之事耶人之行莫大於改過成湯猶
以改過不吝見美夫子猶謂學易可無大過況其下
者乎然則以不遷怒貳過稱顏子之好學無以易矣
攷證以為未盡顏子好學之事非愚所敢知也攷證

又歷舉顏子博文約禮欲罷不能克己復禮請事斯語私足以發語之不情為夫子不舉彼而舉此全為藥哀公之證竊恐亦未為得之蓋此乃是言於顏子既死之後夫子正欲舉其克己效驗之所極以告君欲罷不能諸事皆是用工處未足以見其極致處故不舉耳初豈以箴君之故不當舉却舉當舉却不舉哉至曰為哀公對病之藥恐或有之亦自與此不相妨也

未聞好學者也集註蓋深惜之又以見真好學者之難得也攷證今也則亡惜辭也未聞好學待辭也

待辭之說雖與集註微異似亦可備一說

子華使齊章通引馮氏謂聖人以子華之富故不繼之以思之貧故多與之子華不繼富原思周急也

為宰既有常祿則非因思之貧而多與之也設使子華為宰常祿又可減乎以此為周急之證似未切當若以教之以與鄰里鄉黨為周急之證則庶乎近之

子謂仲弓章集註犁雜文 通引馮氏謂犁服耕也通
謂馮說未為無理姑存之

若以犁為雜文則父賤行惡之喻方不突兀若以犁
為服耕則可以為賤而不可以為行惡矣行若不惡
則仲弓可用無疑又何為有雖欲勿用之喻乎

輯講本文只言且角不見有周正之意角疑取繭栗握
尺之義駢喻其氣質之純粹角喻其德行之將成山川
諸侯所祭恐亦是可使南面意

言駢則見有不駢者言角便見角有不如此者角不如此非不周不正而何周則兩角完具如鼯鼠食郊牛角則不周矣正則兩角端正今之牛有兩角不相似者多矣可以為正乎言正則可以該鬴栗握尺之度矣况繼之以中犧牲也中之一字則必合乎鬴栗握尺之度不假言矣分駢角以喻氣質德行似乎附會至曰山川諸侯所祭則駢角之牛特為諸侯之所用者耳以為亦可使南面意亦所未喻

回不違仁章集註或日一至焉或月一至焉能造其域而不能久也語錄日至是一日一次至此月至是一月一次至此集成真氏曰詳集註意謂一日全不違仁一月全不違仁語錄以為一日中一次不違仁一月中一次不違仁二說不同當以集註為正

按集註語錄之說似無以異至字與違字不同違是自內出外至是自外入內以張子內外賓主之意推之違是暫出故不害其為主至是暫入故日月至焉

雖疎數不同皆只可以為賓若經注皆改至為違則其說可通愚自見真說即如此疑後來四書通板行果亦如此分別違至之義通雖不為辯其說而發然二字之義既明觀者可無惑矣

語錄三月只是言其久爾非謂三月後必違也 通引馮氏謂三月之久而不違則信不違矣但守之也非化之也

朱子之說最活蓋三月只是說久却非限定三月一

度違亦非謂既久而不違馮氏以為信不違矣其說死而不活非朱子意也詳尹氏既以聖人為渾然無間斷而顏子未達一間即未達處便是間斷間斷非違而何夫子稱顏子亦曰不貳過有不善未嘗不知未嘗復行而已過與不善便是違處不違則何過何不善之有過而不貳不善而不行非守不能未能無過與不善可見未化程子守之也非化之也之論其意蓋亦如此馮氏用其辭而不知其意可乎更以雍

也仁而不佞章集註參攷可見

季康子問仲由章可使從政 通引葉少蘊曰是外將
進之與共圖國政齊氏曰季桓子遺言召孔子康子止
召冉求然則其先問由賜意固在求而假之以發端爾
康子不過如孟武伯之問由求亦皆是欲知其人之
何如爾葉齊之說未必然也

集註從政謂為大夫 叢說在國為政在家為事季氏
盖以國政與家臣謀之以冉有退朝謂有政觀之可見

季氏欲得家臣謀國事故歷問之非謂即欲使為大夫也

彼章是冉有退季氏之私朝所謂政者實是國政而謀於家耳此章泛問可使為政豈可以彼為例而意其亦如此乎朱子以為大夫釋之當矣况夫子於冉有之言分別政事名分極嚴此章果如叢說所料夫子宜亦少正名分以微示季氏可也今皆不然則似未必如叢說所料者然則但如集注所釋以全聖人

不逆不億之誠可也

君子儒章 攷證謂集註程謝二說恐子夏不至此云
云文公嘗言子夏太細密謹嚴又云其促狹於子游葉
賀孫之問亦言其太緊小如此則君子小人只是以度
量規模言若樊須小人之類蓋對大人君子言之特有
小大之分耳非言善否之殊也至為學者切已省察則
集註在所深省

儒是學者之稱樊遲以學稼圃而見斥為小人豈可

援以為例攷證不欲貶了子夏意固忠厚但異日夫子答其問政之言亦以無見小利戒之攷證恐子夏不至此夫子豈誣子夏者哉然則程謝之說自無可疑者

子游為武城宰章集註愚謂持身以滅明為法則無苟賤之羞邪媚之惑八字與正大之情四字相反

通說是已然苟邪是貼不由徑意說賤媚是貼不至偃室意說亦所當知也

不有祝鮀之佞章 輯釋引齊氏曰世衰尚巧言雖有
令色如朝亦必佞而後免又引其師之言曰自上蔡疑
而字為不字故齊氏亦因而字為此說與集註少異姑
存之

按謝氏之意正防世儒有如齊氏之見者設爾朱子
以為從伊川說云云則集註固自有斟酌矣齊說可
刪

質勝文章集註言學者當損有餘補不足 發明愚謂

先有質而後有文文所以文其質也文得其中方與質稱文不及則為野文太過則為史故文可損益質無損益學者損史之有餘於文以補野之不足於文使文質相稱不為史之文過亦不為野之文不及則有彬彬之美矣 輯釋亦引之

發明文可損益質無損益之言似矣但以集註誠或不足之言推之誠即質耳不足非益又何以得中乎然則野之有餘於質在所當損者亦不可謂無矣竊

意集註損有餘補不足是通說二句之旨主質勝文
言之則損有餘之質補不足之文以就中主文勝質
言之則損有餘之文補不足之質以就中如此則似
順文解義若如發明所言則損有餘一句專主文勝
質言補不足一句專主質勝文言先主下句而後主
上句似非順文解義之體集註不應爾也不知如何
况經所謂質勝文文勝質是泛說有此二等人耳非
謂一人之身質既勝文文又勝質也集註損有餘補

不足之云是通為二等人言之各當有所損益云爾
發明乃謂損史之有餘於文以補野之不足於文以
之一字似共主一人言者豈有一人之身既失於野
又失於史者哉讀者其詳思之

中人以上章 攷證王元敬王剛仲謂以字似重蓋中
人之質固多然能以之上則可以語上以之下則不可
以語上矣集註本為教者言此則併為學者言

如集註說則當於上字下字加讀如攷證說則當於

二人字著讀況以上以之下皆承中人言之則只
言中人以上可以語上也以下不可以語上矣文意
方順不應中間再有中人二字今既不然則但當以
中人以上中人以下分資質之優劣以可以語上不
可以語上為施教之次第初不為學者言也若以為
為學者言又欲其以上而不欲其以下則學者自知
不明妄意躐等何所不至哉吁說經求奇之害可不
慎諸

樊遲問仁智章集註程子曰先難克己也 饒氏曰以克己為先難固善然克己乃求仁之事非仁者事也

按輔氏謂克己最難求仁之功莫先焉然則克己固求仁之事以克己為先非仁人之心乎蓋克己是難先難亦曰以克己為先耳觀程子以所難為先之言可見其意矣程子非以克己而訓先難也

知者樂水章仁者壽 叢說非必壽如堯舜然後謂之壽蓋受命於天其壽夭固一定而不可易人能知命而

保其天之所以與我者全而歸之是壽已得若立巖牆與
桎梏而死則是我天之非正命也由是觀之則雖顏子
亦壽也

洪範福極分明以壽與凶短折對言則固不可以短
為壽也夫子之於顏子再言其不幸短命而叢說以
為亦壽可乎仁者壽與大德必得其位等皆是有此
理而已顏子不得其壽與夫子不得其位何異然則
亦強說夫子為得其位又可乎蓋亦觀於語錄有曰

仁自有壽之理不可以顏子揅來看如罔之生也幸而免固亦有死之理詳此則顏子亦不幸而不壽耳叢說所謂保其天之所以與我者全而歸之如顏子者謂之得正命謂之順受其正可也何必強說以為亦壽哉

齊一變章 攷證王氏曰齊之盛時已不如魯魯之衰時尚勝於齊

不如魯下欠著之盛字勝於齊下欠著之衰字意不

明白觀於或問則曰自其本言之則雖太公盛時已必一變而後可至周公伯禽之王道自其末言之則齊俗益壞之後又必一變而後可以及魯之衰也詳此則考證之為欠字可知竊意攷證正是隱括或問而反不如或問之明白者也後儒立言往往不能出得或問語錄之意而重述一番反不明白者皆此類也何如但存朱子之說之為愈乎噫

觚不觚章集注觚稜也或曰酒器或曰木簡 通引馮

氏謂觚為酒器見於禮經為木簡見於漢急就章則謂為簡屬者秦漢以後之稱非孔子所謂也 輯釋亦引之

簡屬稱觚其名雖見於漢史其制則不知起於何代又安知夫子之時不已有之耶大抵經註之旨所重在稜其為酒器為木簡在所不必辯也常謂凡此等處集註皆兩存之而於先後上見其優劣者非唯疑事毋質亦恐或有所遺故爾馮氏蓋不足以知此也

君子博學於文章 攷證顏子博約是知行並進此章
所重在行

按此是本集註程子之說而言也但程子之說集註
置在圈外而集註所自為說則是知行並進之意攷
之經文亦未見決然偏重行處豈集註本說是正意
與顏子博約只一般但行終是重集註又恐人徒知
不行故又以程說防其弊耶

中庸之為德章 饒氏謂此章與中庸之文大同小異

此以德言彼以道言此章民鮮是世教衰民不興行而然彼章民鮮能是氣質有過不及而然此章久矣是近世如此彼章久矣是自古而然 輯釋亦引之

德與道之分別似矣然以德行言則曰中庸則彼章雖謂之德亦可也但集註章句所以訓釋民鮮民鮮能者皆以為世教衰民不興行所致而饒氏云然豈非以彼下章知愚賢不肖皆是以生稟之異而言乎然朱子釋民鮮能則歸之世教之衰釋知愚賢不肖

之過不及則歸之生稟之異是二章所主不同矣而於或問則又以為此亦承上章民鮮能久矣之意也豈章句或問之說自相戾耶意者氣質之異雖自古而然道之不明不行則不自古而然然則同此氣質之異而道之不行不明則古不如是至末世乃如是者豈非以古之世教盛後之世教衰而然歟章句於民鮮能則歸咎於世教衰於知愚賢不肖之過不及則以為由於生質之異其意若曰世教既衰則民不

興於行而無以變化其氣質之異此道所以不行不明也夫況若自古不明不行聖人又何必以我知之矣為言乎詳我知之矣四字隱然若有所感者若自古而然則人所同知聖人之言必不隱然若有所感者矣饒氏之說以是推之可也

博施濟衆章 饒氏謂博施濟衆恐只是一事博施是推恩於四海九州濟衆是四海九州無一人不被其澤事不難於博施而難於濟衆故在博施之下 發明採

語錄云博施於民而又能所濟者衆云云濟衆難於博施有雖博施而衆不皆被其澤者

饒氏謂博施濟衆只是一事亦有理似可備一說但謂不難於博施則恐未然如饒說則博施是本濟衆是效衆之所以未盡濟者正以施之未極於博耳發明所引語錄之言攷之諸編語錄並無此意得非即是饒說而誤作語錄出耶今觀集釋不引饒說直以發明所引為發明自說然則發明蓋亦以饒氏意為

已意也

何事於仁必也聖乎集註仁以理言通乎上下聖以地
言則造其極之名也 饒氏謂何事於仁必也聖乎是
仁聖自有等級則仁不可通乎上賢如仲弓猶未得為
仁則仁不可通乎下以此推之則仁聖皆是以德言皆
是地位言非以理言也

以達德言之則三行主仁安行是聖人之仁利行是
賢人之仁勉行是學者之仁謂仁之理通乎上下何

不可之有况博施濟衆正是仁之功用而堯舜猶病
謂仁不可通乎上可乎欲立立人欲達達人聖人之
仁亦不過如此而已是以賢人學者所可馴致而與
能所謂仁以理言之旨蓋如此若謂仁亦是以地位
言非以理言則聖與仁為二非唯何事於仁必也聖
乎二句解撥不開而析聖仁地位而二之亦不成道
理矣集註固不容不如此說也

何事於仁 攷證何事程子說作何止朱子作何消何

待豈但金氏按事字似重止字似輕當作必有事焉之事謂其用工為仁也以博施濟衆為仁愈難愈遠學者如何下手又曰子貢說博施濟衆可謂仁乎夫子謂如此則何以從事於仁此乃聖人事功之極雖堯舜亦猶有所不足於以求仁有何涯涘云云

按程朱之說字訓雖不甚切而文意已順如攷證事字之釋雖有孟子可據然全句意義說得費力不知孰為得夫子之意也但有程朱之說微有抑仁揚聖

之意與仁理聖地之旨有些少礙姑表攷證之說而出之以俟明者之折衷焉

述而

首章集註老彭商賢大夫見大戴禮攷證老彭商大夫此古註之說然雜書本云彭祖商賢大夫恐古注之說或出於彼今按大戴禮虞戴德第七十篇曰公曰善哉子之察教我也子曰丘於君惟無言言必盡於他人則否公曰教他人則如何子曰否丘則不能昔商老彭

及仲傀政之教大夫官之教士云云按仲傀即仲虺為左相而云老彭及又云教大夫則老彭不止於大夫矣此雖不可攷然云大夫則恐古註誤認為彭祖爾

按集註亦云見太戴禮而賢大夫之說則因古註而不改者戴禮既不言老彭為何官固不容不因古註而自為說也意者大夫亦有可通稱者如諸侯上大夫卿之類耳古注誤認為彭祖之疑則今四書通證諸編皆即以為彭祖又不知如何

子之燕居章集註燕居閒暇無事之時 通引齊氏謂
居設席於地兩膝著地而以足加趺也故孔子嘗謂曾
子曰居吾語女而下文言曾子避席

如此釋居字是以居為跪坐也引證雖明但不知聖
人閒暇無事之時終日跪坐否抑跪坐時申申天天
若立若行時亦申申天天否又經云士而懷居亦是
懷跪坐否其居使之然也亦是其跪坐使之然否經
史凡言居字又皆可以跪坐釋之否惜乎齊氏之不

及盡釋也愚奚庸贅

志道據德章集註先後輕重本末內外 發明引胡氏曰道德仁當先藝可以少後志據依當重游可以少輕

按語錄論先後則藝為先三者為後論本末則三者為本而藝為末固不可徇末而忘本習藝之功固在先游者從容潛翫之意又當在後詳此恐藝不可言後意者集注先後之序言志據依游輕重之倫言道德仁藝況序言工夫倫字言事理於義尤明未知然否不然則但以志道據德

依仁為先為重游藝為後為輕不必細分可也今輯釋兼
引語錄及胡說合而觀之得失自見

子於是日哭章發明是日先歌或遇哭哀不能已也是日
先哭或遇歌則不當歌樂可以已也司馬公之喪程子東坡
舉此以辯亦所當察

發明之言似矣然又有不可泥者隨時處中可也若是日
方歌而卒然有家門親戚之大故哀固不可已而不哭也
程蘇所辯乃是方預朝廷大禮而東坡遽欲就此未散相

率赴弔則是有輕視朝廷吉禮之意於此為不敬於彼為不專矣夫弔同僚之喪與親戚大故哀情不無緩急之辯以俟翌日亦未甚害而東坡克伐必行但知強辯而不酌輕重豈理也哉發明隱然有右蘇之意故折其衷如此以俟知者

用行舍藏章集註謝氏曰若有欲心則不用而求行舍之而不藏矣 饒氏謂用之不行是好遜底舍之不藏是好進底自有兩樣人謝氏只說得好進一邊 輯釋亦取饒說

人固有兩樣然世之好遜者不一二好進者常千百謝氏又自有欲心上說來故只說好進者耳蓋好進正是徇欲好遜者以理言之雖亦是欲然自好進者而觀則好遜反似無欲者矣况子路以行軍為問亦只是好進謝氏下文正說歸子路雖非有欲心者上去又安得不但就好進一邊說乎况下章設執鞭之言亦只為好進者之戒更以語錄常人用之則行乃所願舍之則藏非所欲之言參之則好進者多於好遜者益可見而謝氏專說好進者益為有

切於世教矣通與馮氏亦皆無好遯者言通又自謂玩集
註語錄而為此說集註語錄何嘗有此意哉以愚觀之皆
不過是祖述饒氏之意而又不肯明言其所自來耳饒氏
兼二等言不為無理但參之經則不如謝氏之切存之以
備一說可也

集註謝氏曰云云子路雖非有欲心者然未能無固必也
發明此二句可畧

竊意欲心重而固必輕孔顏用舍無預於已行藏安於所

遇正所謂無固必者子路以行軍誰與為問正是不用而求行者非固必而何然則二句固不可畧也

子在齊聞韶章 饒氏謂程子改三月為音字朱先生又

因史記漆學之二字要之皆未見的實且據本文恐是聖人乍聞此樂見得妙絕古今心誠好之故三月不知肉味程子以一日聞樂三月忘味似乎固滯故改三月為音朱子據史記漆學之二字則不煩改字而自不為固滯矣史記是先漢近古文字朱子信而引之而雙

峰以為未見的實何耶程子恐似固滯而雙峰獨不以為固滯又何耶程朱與雙峰所見孰淺孰深孰為可信孰為不可信必有能辯之者愚奚庸贅

夫子為衛君章 通引吳氏曰輒之事子路以為是而再有子貢疑其為非者也又引馮氏曰云云然則世子亡而立孫禮也此再有子貢之徒不能無疑也

吳馮所論二子之疑意正相反然以集註證之則馮說為近集註扣馬而諫 發明箋輯釋通證皆引史記武王載主伐

紂夷齊扣馬諫曰父死不葬爰及干戈可謂孝乎云云此漢儒無見附會不經之言以誣聖人箋與通證不能辭而闢之反援其事為證陋矣扣馬而諫餓死首陽事則有之載主伐紂夷齊諫辭皆附會耳豈可不分別而兼存之耶集註與程子皆以遜國諫伐二事並言 叢說子貢以爭國讓國相反以求聖人之心則集註亦但以夷齊逃國之事明其無怨足矣而中間突入扣馬一事何耶蓋子貢之問止曰夷齊何人及怨乎而未嘗言逃國之事夫子

答之亦止曰賢人與何怨亦未嘗專指逃國而言也聖人蓋以夷齊平生心事而答之而平生大事無大於逃國餓死二事者然則微諫伐餓死之事則何以必知其逃國之無怨乎安知夫子不併以此事斷之為無怨乎故集註不得不入此段而惟以逃國事論此章之旨也此段最發得集註意出諸編多見不到此故表而出之飯蔬飲水章 叢說言不改其樂而著顏子於上是簞瓢陋巷不改顏子之樂也言樂在其中而連食水曲肱

之下是孔子之樂在食水曲肱之中也云云

曰簞瓢陋巷不改顏樂孔樂在食水曲肱之中造語不瑩反若簞瓢陋巷不能改顏子之樂無異於疏食飲水之言者其實回也不改其樂是回不以至困而改其樂守之之事內不以外而動也疏水曲肱樂在其中是至困而樂亦自若化之之事外不足以動乎內也叢說之言觀者不以辭害意可也學易章叢說無大過兼有於易道無過之義攷證按史記作我于易則彬彬矣似謂讚易無差失集註存此當兼思之

按語錄答周謨之問已不取此說不必兼存以眩觀者
可也況我於易則彬彬矣之言集註正引以為證
朱子正作已無過說了而攷證乃如此說詳我於易
三字當以我為主則彬彬屬我而不屬易明矣除非
則下彬彬上更有易字則攷證之說乃可通耳

發明按伊川南軒加與五十字皆從舊夫子贊易年七
十耳與五十學不相妨也中年學易所以晚年能贊易
也輯釋亦引此說

按集註據劉氏所見為證史記又明有年數奈何皆不足信乎竊意學易即贊易耳不過謙言學之而已若但以習誦講說為學易亦恐不待五十而後然也然則朱子固自有斟酌矣

集註學易則明乎吉凶消長之理進退存亡之道
成真氏謂陽長則陰消自十一月復一陽生一陰消至四月乾純陽六陰盡消陰長則陽消自垢至坤亦然
陰陽消長恐不特指此十二卦言當以先天圓圖循

環觀之須見六十四卦皆有消長之義始得

集註他論 攷證舊來經書無印本太學博士兼立諸家之本學者所在傳寫自五代長興以來國子監始有板本然與開元本已微有不同開元本已與古本不同自來民間傳寫本猶有存者故劉忠定尚得見他論今書皆以監本為定更不參攷然此五十字其來久矣微子篇荷蓀丈人章集註所謂福州有國初時寫本亦此類也

發憤忘食章集註全體至極純亦不已 叢說言聖人之

學全體而又至於極以一事言未得則憤既得則樂是至極而樂也以萬事言憤而樂樂而又憤憤而又樂必至全體也云云 攷證聖人無所不致其極發憤忘食則無理之不可得樂以忘憂則無入而不自得故曰全體至極云云 按叢說攷證是本通釋第九篇出事公卿章之說而言也唯饒氏說全體至極與此不同似於憤樂忘食忘憂之義切當不可移易說純亦不已之義則皆無甚來去

讀者攷焉可也黃氏之說饒氏之意皆於第九篇述之

怪力亂神章集註鬼神造化之迹

輯講問學者鬼神

既是造化之迹則非微妙難知胡為聖人不語學者未能對饒氏曰伊川說以功用謂之鬼神以妙用謂之神是以鬼神為顯者而神為鬼神之微者故謂鬼神為造化之迹其說與中庸不見不聞者少異集註引此為說而復繼之曰非窮理之至有未易明者未能深惟其意詳雙峰之意似欲以神為妙用之神豈以經文專言

神而不兼鬼歟恐不必如此泥妙用之神固不言鬼神之神亦豈易言姑以淺近言之後世釋老巫覡所以誑誘愚俗而舉世莫能辯詰者何者不依鬼神譎張為幻耶使夫子而輕與理有未窮之人言之亦安得不滋其惑哉若謂造化之迹為非微妙難知則恐不可如此言之容易易大傳云精氣為物游魂為變是故知鬼神之情狀此正是窮理之事謂鬼神之理不微妙不可也祭義宰我曰吾聞鬼神之名不知其所謂宰我聖門高弟且不知其所謂謂鬼神

神之理不難知亦不可也觀明道與上蔡答問之旨與這
是天地間妙用須是將來做題目入思議始得講說不濟
事之言則雙峰謂未喻集註非窮理之至有未易明之言
尤非後學所敢知也若謂造化之迹與中庸不見不聞者
少異恐亦不必如此說當於中庸辯之此不贅及

聖人吾不得見章集註張敬夫曰聖人君子以學言善
人有恒者以質言 饒氏謂中間如何不說君子吾不
得而見得見善人者斯可矣蓋聖人善人是說天質君

子有恒是說學力夫子言生質之美者不可必得而學力所至者可勉也又謂此聖人是生知安行底非大而化之之謂大而化之是反之之聖非性之之聖也 輯釋亦引饒說而為之修改以求合於集註然終不可合按雙峰說聖人有恒與集註異說君子善人與集註同但其意隱然以君子為反之之聖是就聖人中分出性之反之二等却以聖人君子當之則此所謂君子與集註才德出衆之說又自有高下之分也竊意此章本只是嘆世道

之意自聖人至有恒者皆恐不得見之非謂聖人善人不
可見而君子有恒者可見也中間所以不說君子吾不得
而見得見善人者可矣者正以善人不及君子人所共曉
善人尤不可見則君子之不得見者不假言矣今日聖人
是天生底故不可見似矣但以忠信如丘好學不如之意
觀之則知美質易得至道難聞而已未聞徒嘆天生底之
難得也曰有恒者是把握得定底故可得見則下文無而
為有三者乃是難乎有恒之故有恒者又可得而見乎然

則謂聖人為天生有恒為學力殆未必如此至於分性之
反之之聖為二亦有可疑若果如此則夫子何不曰性之
之聖吾不得而見得見反之之聖斯可矣耶今不言反之
之聖而但言君子則天下後世皆將以聖人為不可學而
至孰知君子之即為反之之聖而不為聖人之次乎然則
此章所謂聖人亦當兼性之反之之聖而言不必以為非
大而化之之聖可也叢說既與集註不合則刪之可也辯
之可也輯釋為之修飾而同用之過矣終於不合又何益哉

發明既引饒說又自以為自有恒而入學而充之以至於極有至於聖人之理云云

饒氏刻畫求奇發明引其說而不辯其同異既失之矣又自以為有恒可至於聖則聖人又可學而至信如集註聖人以學言之說也然則饒氏此聖是天生底是生知安行底非大而化之之謂等說又何必引耶

蓋有不知而作章多聞擇其善者而從之多見而識之知之次也集註識記也所從不可不擇記則善惡皆當存之

以備參攷如此者雖未能實知其理亦可以次於知之者也
語錄聞是聞前言往行從之是擇其尤善者而從之見是
泛泛見得雖未必都從他然也須著記他首尾得失 輯講
謂有格物之知有聞見之知格物窮理故為知之至聞見一
事只應得一事然聞見多則所知亦多故為知之次又謂多
聞是聞人之言亦難憑信故就裏面擇其善多見是自家一
一親自底善惡皆當記以為法為戒

朱子以聞為聞前言往行故以為見泛於聞雙峰以聞為

聞時人之言故以為聞不如見要之見須是目所親睹聞
既非目所親睹又何必拘於聞時人之言乎雖古昔言行
非目所親睹凡得之師友方冊所傳者皆聞耳然則固當
以朱子為正分格物之知與聞見之知而言亦因以聞為
非聞前言往行故如此說其實大學之道何嘗遺聞存見
而可以格物乎其詳已於子張干祿章辯之矣其聞不言
記見獨言記之說蓋以前言往行已具於方冊不在我為
識之見則主時人之言行未有人記不可不識之也雙峰

之說殆不其然至謂夫子不以格物之知自居恐亦未必如此夫子自言十五志學學何嘗不是格物致知等事且謂夫子不居格物之知則何以率人大學之道不幾為無用之虛器乎大抵聖人於成功之事則不居於用工之事則不讓如若聖與仁章於聖仁之事既不居却又以為不厭誨不倦自處之類是也此章亦是如此蓋所謂知者不但指格物致知之工夫而言乃是指物格知至之成功而言所謂多聞擇善多見而識者却便是格物致知之工夫

非聞見自聞見格物自格物果有不同之知也

叢說世蓋有不知其理而妄作其事者我則無是也多聞則非不知擇善而從則非妄作此二句正反上二句而言然又自謙以為於理未能盡知所以下文曰我於今人言行多博其見則善惡皆備於此以備參攷雖未足為知之明是亦知之次按攷證亦有分四句在上二句在下之意然引而不發以為細翫集註自見且援班固溝洫志贊所引為證叢說正是本此而發揮之耳愚竊以為班固之言不足深信若曰

細翫集註則集註似無此意奈何况語錄有曰知以心言得於聞見者次之何嘗專以多見而識為知之次哉然則叢說正不當立異以眩學者

互鄉童子章唯何甚集註唯字上下疑又有闕文大抵亦不為已甚之意通引馮氏謂孟子不為已甚之意蓋出於此孟子自論聖人平日大槩所為其意恐不專主於此集註亦但言唯何甚三字不過是不為已甚之意而已固不謂孟子之意必本於此也要之此章却是不為已甚之一事

不為已甚乃是唯何甚之通例馮說未必如此

攷證或云當是互鄉難與言之童子蓋與其潔等四其字是
指童子非指互鄉也若互鄉人皆難與言則夫子當曰與其
進也不與其退也與其潔也不保其往也今存此說以備參攷
互鄉難與言童子見如或說須於言字下添之字方說得
透今既不然則或說之不然可知大槩只是互鄉人既皆
難與言而童子又蒙昧未通又難與言中之尤甚者故門
人疑之耳若只是童子自難與言則聖人有教無類正當

有以樂之不知門人何惑之有說經正不在於求奇也

仁遠乎哉章 語錄至者昔者亡之今或在此非自外至耳
通謂日月至焉之至自外而至也斯仁至矣之至非自外
至也故集註曰即此而在

通說已當但日月至焉是心至乎仁斯仁至矣是仁至乎心
心有出入而仁無內外故彼為自外而至此為即此而化
陳司敗章謂之吳孟子 通引吳氏謂謂者何人謂之
春秋書孟子卒疑謂之孟子者魯臣諱之謂之吳孟子

者當時譏誦之語也葉少蘊曰其曰吳孟子則魯人固不以同姓為諱矣輯釋亦引吳說

按通引此二說意自相反要之昭公習於禮文豈不知娶同姓之非禮但既迫於事勢犯禮而娶之故只得諱之而謂之吳孟子以自文耳謂之猶言稱之也故謂之吳則紀其實謂之孟子則隱其姓固皆昭公自為而自諱之觀司敗上言君下言謂之則謂之為昭公自謂可知初豈魯之臣子與國人敢創為如是

之名以譏誦之隱諱之乎春秋所書却是諱惡之義
但孟子之稱乃是因有此名而稱之亦非春秋之自
創也其所以不書吳者蓋夫人魯之夫人若以吳字
加其上則於文義有不順矣

文莫吾猶人章集註謝氏曰躬行君子斯可以入聖故
不居

以下章為聖仁事不厭意觀之則躬行君子宜非夫
子之所當讓蓋躬行君子而有得則造其域矣故不

居三字正說未之有得之意

若聖與仁章 通引馮氏謂此章孟子蓋嘗述之孟子
言夫子不居其聖故以智易聖爾

孟子所引分明是夫子與子貢答問之辭此章分明
是與公西華答問不妨自為非一日之言况此章有
聖仁二字在上而下文以抑為之三字承之所謂之
字正是指聖仁而言孟子所引則但言我學不厭教
不倦而已不過如前章學而不厭誨人不倦之意耳

然則此章自是以聖仁之事為不厭誨不倦非以為
不厭誨不倦為聖仁也孟子所引却直以學不厭教
不倦為智仁之事而非謂以智仁之事學不厭教不
倦也二書旨意固已不同如此又况彼章下文自有
仁且智夫子既聖矣之言則聖自是聖智自是智又
何嘗以智易聖乎且以學不厭為智教不倦為仁又
是子貢述夫子所言而釋之者今直以為夫子自言
而孟子述之皆所未喻假如所言則孟子既曰引夫

子之言又何為遽自改易其字以就已意乎

攷證集註於博施濟衆章既辯聖乃仁之極而此章又云為是為聖仁之事亦以此聖仁誨人則又似聖與仁為對按此聖言其意仁言其及物夫子雖不敢自聖而所言為之不厭即作聖之事誨人不倦即及物之仁為不厭即學不厭之意學不厭教不倦前章與子貢凡兩出似不必異說

竊意夫子以與之一字介乎聖仁之間似不可以仁為不是與聖對言者前章博施濟衆正是仁之功用

而夫子乃曰何事於仁必也聖乎則仁外無聖聖即仁之極致可知兩章文勢既異自不相妨也集註所以不於此處但作學不厭教不倦釋者正以為之不厭此之字宜有所指捨上文聖仁則無以當之故爾如考證之說則之字只是虛字未知如何但曰為之不厭即作聖之事謂之作聖則未便是聖自與夫子聖吾豈敢之言不相妨猶之可也曰誨人不倦即及人之仁謂之即仁則仁宜不外是矣然則夫子又何

以併言仁吾豈敢也哉姑存其說以俟明者之折衷焉

發明引饒氏曰前以學不厭誨不倦為何有於我此却以二者自任蓋前泛說此是人以聖仁歸己既遜了第一第二等且承當第三等事也

按前章語錄亦以為因人稱聖人有此聖人以謙承之然則二章固皆承人之謙辭特以人所以稱聖人者不同故所遜亦不同耳

子疾病章詠 攷證古本論語元作譟說文引論語亦作譟槪亦作譟禱也累其事以求禱也其作誄者則是哀死而述行以諡之之辭同音而義不同必開元長興寫書之誤集註偶未之攷爾 集成發明引胡氏曰哀死憂其不救也述其行恐其行有未至也通馮氏曰士有誄累生時德行以賜之命則誄周官六辭六曰誄是也禱疾亦誄其功德故謂之誄云

按攷證明有左驗其說似不可廢集註失攷恐或有

之但經文爾之一字則是對死者而追言之耳非對所禱之神祇言也如此則古本今本又未知孰是而孰誤也集註之不從古本豈亦以此是對死者而言之辭亦猶孟子鈞是人也章此天之此舊本作比而集註但以此字義優而從今本釋之者耶然彼章集註明以此字比字較其義之所當從而此則不然又不知如何唯饒氏以為誅如今祭文之類似得經註之旨胡氏馮氏既不知攷證所據又不達集註之旨

皆以為集註即以誅為禱辭蓋兩失之不可不辯

泰伯

首章集註太王之時商道寢衰而周日強大季歷又生子昌有聖德太王因有翦商之志而泰伯不從太王遂欲傳位季歷以及昌泰伯知之即與仲雍逃之荊蠻輯講某嘗有疑史記雖云祖甲時商道始衰帝乙時商道益衰然書稱祖甲迪哲帝乙畏相與湯文並稱不知商道何以至此反衰使太王於此而遽萌翦商之志則於

以服事殷之意為如何泰伯不從固善然遂逃之以成其父之私志求以自潔而委惡於弟姪又安得謂之以天下遜乎意者太王末年見商道寢衰人心之歸周者日盛季歷又有賢德而子昌孫發又皆仁聖於是始有傳位季歷以及昌發之意泰伯知之故不告而逃以成父志皆所以上順天命於幾微而下為他日開拯民水火之地也云云此說與集註所引左氏之說小異

按雙峰此說自某嘗有疑至安得謂之以天下遜一

段皆是破集註之言自意者太王末年至開拯民水火之地一段乃是雙峰已意然却又與集註之意無甚異處不知所謂與集註所引小異者其旨安在詳其語脉不過改集註太王之時為太王末年添入孫發仁聖一脚却隱了泰伯不從之意而已然集註但曰太王之時亦自與末年之說無背但言子昌而不及孫發亦自不為有所遺况武王壽九十三計中間王季文王武王在位之外其在太王時年有幼弱政

不必言太王見孫發聖仁而欲傳位可也然雙峰已說前既以太王見商寢衰人心歸周者發其端後又以順天命開拯民者究其說則太王翦商之志又終不可得而回護而中間所謂泰伯知之不告而逃以成父志者又只是不從翦商之志然雖自謂與集註所引小異實則不見所謂異也况如集註之說則太王所以有翦商之志者亦是至公至仁之心而非苟貪天下之私泰伯則自以為君臣之意凜然不可犯

而去二者固並行而不相悖若如雙峰破集註之說則太王翦商之志為私志泰伯成父私志為未善傳位弟姪為委惡皆不當如此及其所以自為太王泰伯計者又不免皆使之如此其說自有所不通矣學者但以語錄或問之意參之則可見太王泰伯之志並行不悖而雙峰所疑朱子皆已言之矣然則雙峰引書以證祖甲帝乙之世商道宜未衰者如何曰太王末年見商浸衰雙峰亦自言之矣太王末年非祖

甲帝乙之世而何且三宗祖甲蔡傳雖以為武丁之
子然古註及諸家多以為太甲蘇氏謂以享國久近
為序者似得之觀孟子但言由湯至于武丁而不及
祖甲但言紂之去武丁未久而亦不及祖甲可見豈
有祖甲預三宗之一為周公所稱孟子正欲言紂時
祖宗德澤未衰不應自湯言之則遺祖甲於後自紂
言之乃越祖甲而數武丁也帝乙與湯文並稱乃是
武王周公對商人言故有所褒而無所貶亦聖人忠

厚之意爾不然三十王中如陽甲武乙豈皆有道之君耶而周公則曰自成湯至于帝乙罔不明德恤祀觀罔不二字則中間豈皆無失道之君哉其為聖人忠厚之意明矣然則史記始衰益衰之言未為全不可信雙峰力據書而疑史記毋乃於聖人忠厚之意史記傳信之言兩失之歟

語錄問詩云太王實始翦商恐是推本得天下之由如此朱子曰若推本說不應下實始翦商翦商自是周人

說若無此事他豈肯自誣其祖左傳分明說泰伯不從
不知是不從甚事 書蔡氏傳太王肇基王迹傳曰詩
云居岐之陽實始翦商太王雖未有翦商之志然太王
始得民心王業之成實基於此 攷證叢說皆祖蔡氏
意以釋翦商之旨

按蔡說正是語錄推本之問而朱子以為不然者其
意不為不厚若但始其說於詩書固似可通參以論
語以天下讓之言則恐不無可疑何則若泰伯自無

可得天下之理則不過以國讓耳今夫子曰三以天下讓以之一字便見泰伯以己所可有者讓於弟姪不但讓國而已也所以集註必以夫以泰伯之德當商周之際固足以朝諸侯有天下矣乃弃不取之言而發明之推此則詩所謂實始翦商書所謂肇基王迹不可但如諸儒推本之說矣雙峰非不欲直如此說其所以雖破集註而不能大異於集註者亦以有見於此而不敢爾諸儒則不復顧此而敢於雙峰所

不敢者矣愚以其更相唱和易以滋人之惑故因語錄所辯而詳言之以俟明者之折衷焉

輯講又謂三遜者謂其一遜王季再遜文王三遜武王也攷證亦援此說發明後漢和帝紀三讓者太王疾採藥不返一也不奔喪二也文身三也

按集註但以三遜為固遜雖程子有不立一也逃之二也文身三也之目亦不之取而又述其意於或問曰古人辭讓以三為節一為禮讓再為固讓三為終

讓故古註至是但言三讓而不解其目也今必求其事以實之則亦無所據矣朱子去取之意如此而雙峰又為此說以實之然較之程說意義殆又不及迹其所以撓入孫發仁聖一脚於前者殆為此說之張本也攷證叢說皆是述其故智而攷證則又有不同當別辯之發明所引不過范曄以意度之耳要亦出於古註之後亦何足信哉欲解其目則人人異論誰知烏之雌雄集註或問以此為防而諸儒猶不免此

意

攷證按禮書三讓之目或問亦嘗引之則集註固遜字
當改為終遜蓋遜王季文王武王而終有天下也饒氏
及羅氏路史注亦皆如此說三讓

按三讓為終讓或問誠引之矣但不知集註又何故
不曰終讓而曰固遜豈朱子偶未之思耶抑別有意
耶不可知已但如集註說則以為遜王季文王武王
之說非朱子意矣今攷證乃以終遜蓋遜王季文王

武王言之蓋之一字殆欲推已說以附於集註者其如或問之不欲實其目何餘則已於辯饒說處詳之此不再述

昔者吾友章集註馬氏以為顏淵攷證顏曾在聖門不同時但此章所言非顏子不能而知顏子者亦無如曾子

竊意唯其不同時所以曰昔者

士不可不弘毅章發明引陳氏曰云云伯夷是毅底

然却不念舊惡是毅而能弘也

按語錄弘只是寬廣却被人只把做度量寬容看了
便不得弘是事事著得著一箇不得便不是弘人多
做客字說了則裏面無用工夫處詳此則陳氏不念
舊惡之證得毋近於語錄寬容之意乎饒氏以寬裕
溫柔足以有容為弘之義疑亦有此病當更詳之

民可使由章集註民可使之由於是理之當然而不能
使之知其所以然也 輯講問由之知之兩之字共指

一事而言今集註云由是由其所當然知是知其所以然似乎是一事而饒氏曰兩之字皆指此理而言不須分折可也又曰堯舜帥天下以仁而民從之桀紂帥天下以暴而民從之以其無知故也若知得仁為是暴為非則帥之以暴而不從矣以此觀之民不特不曉其所以然於所當然者亦未易使之曉

輯釋引饒氏答辭于

編

詳集註於當然之上以是理二字加之於所以然之

上以其之一字發之此其字即指是理而言耳理豈
有二乎哉其所以然者即其所以當然之故是已朱
子何嘗析而二之乎問者疑其為二事蓋不達當然
所以然之不一事也雙峰不知明此以釋其疑亦
以不須分析而疵集註殊不思若但曰可使由是理
不可使之知是理依舊只與經文無異何取於訓傳
乎况父使之慈子使之孝慈孝豈非為父為子者所
當然之理乎使之由乎是則民亦可由乎是矣但其

所以當慈當孝之故原於父子之天性者則不可使之知耳又何可不如此分別乃欲渾而言之為是理乎其曰若知得仁是暴非則帥之以暴不從者此則知在未使以前之說也集註何嘗謂民能知是非於未使之前哉其曰民不特不曉所以然於所當然亦未易使之曉此又析所以然所當然而二之之見也集註但曰民可使之由於是理之當然耳何嘗謂民能曉其所當然者哉至於析當然所以然而二之此

則饒氏師弟子所見之誤而反歸咎於集註不亦異乎輯釋去其問辭而唯引答辭于編使若有所發明於集註然者而實則不然誤人甚矣

周公才美章集註程子曰驕氣盈吝氣歉愚謂驕吝雖有盈歉之殊然其勢常相因蓋驕者吝之枝葉吝者驕之本根故嘗驗之天下之人未有驕而不吝吝而不驕者也語錄吝之所有乃驕之所恃故驕而不吝無以保其驕吝而不驕無以用其吝集成永嘉陳氏曰朱子

是主驕說故以吝為本根驕為枝葉若主吝說則驕亦吝之本根吝亦驕之枝葉如此看方著得下兩句未有驕而不吝吝而不驕但吝是斂藏在內驕是發見在外立辭只可以吝為本根驕為枝葉到下兩句方見相為用叢說集註勢常相因及未有驕而不吝吝而不驕是二者互根驕者吝之枝葉吝者驕之本根是驕起於吝

竊詳程子以氣盈氣歉為驕吝之分似乎驕自驕吝

自吝不相關者故朱子言其勢常相因以足程子之意下文枝葉本根二句正是明其所以相因之勢如此自故嘗驗之天下之人以下又是驗其勢常相因之實處初非有二意也以文勢詳之雖字然字是相反以足程子之意處蓋字故字是相應以明相因之勢處孰讀初不難見而陳氏叢說皆以為有二意焉非愚所能及也夫未有驕而不吝謂驕而不吝無以保其驕枝葉未嘗不出於本根之意也未有吝而不

驕謂吝而不驕無以用其吝本根未嘗不發為枝葉之意也主驕主吝不過如此而已况驕是矜夸以街於外亦自不可反而為吝之本根吝是鄙嗇以守于中亦自不可出而為驕之枝葉陳氏自歛藏在內以下與叢說驕起於吝之說皆無以易但陳氏主吝之說與相為用之語及叢說所謂互根者則皆因看得集註勢常相因及未有驕而不吝吝而不驕之旨未瑩故有此誤耳

大哉堯為君章唯堯則之 攷證集註作準則之則尹
氏則之以治天下則又作法則之則其實自堯言之則
法乎天自人觀堯則與天齊準

按陳氏嘗謂尹說當與前合作一意看準則之以治
天下亦是德裏面事而攷證乃如此說不知如何但
孟子集註亦只訓則為法豈彼處偶不及思而筆誤
耶然不可決矣

亂臣十人章 攷證註疏治亂曰亂此甚不道之說今

按古文尚書德惟亂否德商二字正與集註合後人商字加乙與亂相似故遂誤以亂為亂

按輔氏曰荀子治亂謂之亂猶治汚謂之汚亂訓治尚矣竊意荀子近古不應亦誤況諸書皆不作亂而作亂豈得為皆誤耶汚字之例當矣集註不過存此備一說耳前說為勝固自有通例矣

唐虞之際於斯為盛集註際謂交會之間言周室人才之多惟唐虞之際乃盛於此降自夏商皆不能及語

錄問集註云惟唐虞之際乃盛於此恐將舜有臣五人
一句閉了曰寧可將上一句存在這裏若從元註說則
是亂臣十人却多於前於今為盛却是舜五人不得如
後來盛 輯講於字疑只是至字之義言向之盛於唐
虞之際者至此為尤盛也集註雖說得於字之義通然
覺下二句血脉不相貫兼之以五人比十人而謂之尤
盛亦費分說 發明五人反盛於十人即晉三卿為主
可謂衆矣之意不拘拘以人數多寡論也又曰舜即位

之初九官多堯舊臣可見唐虞交會間人才之盛叢
說唐虞之際人才極多不止五人二典中可見所以可
說盛於周

按饒氏欲訓於為至之意其如經典皆無此例何集
註於字之義既通夏商莫及之意亦於下二句不為
無血脉矣五人盛於十人之疑發明三卿為主之證
意雖高而亦未盡事情唯舜初九官多堯臣與叢說
之言似為切當蓋此章自是以三節人才比較上言

舜五臣中言周十亂末言唐虞之際人才之盛則唐虞之際固不止指舜五臣言也唐之末世舜亦是人才一人之數八元八凱舉於舜攝位之初四岳九官十二牧咨於舜即位之始人才之盛為何如哉五人不可及已若曰元凱伯夷夔龍以下功績不甚彰著不可謂其盛於十亂則周召太公固為極盛榮公以下功績亦不甚著又何以知元凱夔龍皆不及之耶要之世代既久功績或著或否皆不足以定人品高

下但聖人所舉所任類皆足以名世尚何疑乎

以服事殷 攷證又力主周至德兼文武而言之說

此說或問取之而集註不用然則朱子固自有斟酌
矣

禹吾無間章黻冕集註黻蔽膝也云云皆祭服 攷證

先言黻後言冕黻恐言黼黻之服又致美黻冕恐是五
服五章以命有德之謂黻冕朝服非獨祭服也詩亦黻
會同可見先鬼神次尊賢次民事亦立言之序

按集註楊氏說有所致飾者宗廟朝廷之禮則攷證
非獨祭服之疑亦不為無所據矣黻冕尊賢之說雖
未必朱子意姑存之以備一說

子罕

首章集註命之理微 通謂人多謂命不謂性故罕言
命

通似以罕言命與不謂命之說相似者其實此命字
是兼理氣說夫子罕言是慮人之未易曉孟子此命

字指氣說君子不謂是防人之自棄二者不為全異亦不為盡同通引彼證此意有未備不可不察

集註命之理微 發明集註言命之理微則此命字以理言不必以氣言 輯釋亦引此說

按程子曰命之理微言命之理而不言命之以理言者便可見此理字虛與對氣而言之理不同命之理微猶曰命之為道理隱微而難見耳所以語錄有云命有以理言者有以氣言者理精微而難言氣數又

不可盡委之天而至於廢人事故罕言詳此則此命
字為無理氣而言無疑發明正為折衷集註語錄而
言但恐未必然耳又如孟子莫之為而為者天也集
註自理言之謂之天若亦以為對氣言者則堯舜而
有不肖之子豈理之當然耶亦不過以自然而然非
人所能為故謂之理爾此二理字雖亦不同要之皆
非對氣而言者讀者詳焉可也

達巷黨人章集註言欲使我何所執以成名乎然則吾

將執御矣尹氏曰達巷黨人蓋慕聖人而不知者也故孔子曰欲使我何所執而得為名乎然則吾將執御矣語錄李時可問吾執御矣不若以為夫子設辭為順答曰黨人之稱夫子如此不知夫子當以嘗執賤事告之而辭其無所成名之大乎當故為自屈之詞而顯其所稱之失耶二者氣象大小必有能辯之者

觀氣象大小之言似以前說為大後說為小者然集註再言吾將執御將之一字又若但為設辭而主後

說然者不知如何豈語錄乃集註未定之說耶

太宰問於子貢章君子多乎哉
通馮氏謂所能之事
未仕之時也君子則既仕之稱治人者也治人則不可
耕且為矣

如馮說則君子是以位言者豈非因夫子賤與不試
之言而意之歟竊意此所謂君子是因太宰以夫子
為聖故承之以謙辭耳其實君子多乎哉便如說聖
人多乎哉一般不言聖人而言君子抑亦謙之意歟

抑亦以君子為聖人之通稱歟是固不敢質言其意之所在但以君子為以位而言則恐未必然耳

吾有知乎哉章 通謂朱子釋兩端謂始終本末上下精粗及釋中庸兩端曰大小厚薄蓋此是夫子教人之言彼是大舜取人之言舜取人言執其兩端而用其一此則夫子言竭其兩端未嘗遺其一也

嘗有同志謂始終本末上下精粗與大小厚薄之義只一般愚應之曰然則朱子何不只以釋論語者釋

中庸或只以釋中庸者釋論語何為一處自為一說
如此不同耶其人無以對竊意中庸兩端朱子本以
衆論不同之極致釋之大小厚薄又是推其類例以
示人如衆論在此有極大者有極小者有稍大者有
稍小者小大各各不同今於不同之中執其極大者
為一端又執其極小者為一端極大極小所謂不同
之極致也執此兩端則凡稍大稍小而未至於極致
者無不在其中矣厚薄之義亦然是中庸兩端之中

必有所該也論語兩端則在乎本末始終上下精粗
四者而已蓋此四者不過皆就一事而指其對待者
言之如本與末對則本為一端而末為一端且以大
學物有本末之義明之則明德為本新民為末大學
之道不過在乎明德新民之兩端而已兩端既竭則
大學之道盡在是矣始終上下精粗之義莫不皆然
是論語兩端之外無復餘蘊也譬之有木於此一幹
十枝而枝幹之大小各各不同論語則但以幹為本

枝為末相對而分兩端兩端既竭則一根之木盡在是矣中庸則以其枝幹之至大者與其至小者為不同之極致相較而為兩端執此兩端則其餘枝幹大小之未至於極者莫不該於其中此二書兩端同異之辯也愚因通者但舉二書之訓釋而不論其同異故以臆說附于此云

顏淵喟然嘆章博我以文約我以禮集註侯氏曰博我以文致知格物也約我以禮克己復禮也 集成蔡覺

軒謂謂之博文亦可見顏子次於生知而與學者用力於窮理格物者有間矣謂之約禮亦可見顏子近於安行而與學者用力於隄防檢柅者又有間矣此所以唯顏子得聞而他人不與也

竊嘗徧攷集註語錄諸說皆無以博文約禮為顏子獨聞而他人不與者則蔡說固可疑矣又按覺軒於亦可弗畔章引師傳之旨曰此博約程子以為只是淺近非顏子所學於夫子之謂以此觀之博約只是

一箇博約其所得淺深却在人如梓匠輪輿同是一
樣斧斤拙者則只能斲削而已工者便自巧妙此言
可謂至矣蔡氏於彼引之而於此又如此說豈以顏
子亞聖不敢以學者視之故忘其前日所引之言而
又為此說耶要之二處所言自相抵牾但當以彼章
所引師說為正

如有所立卓爾集注卓立貌吳氏曰所謂卓爾亦在乎
日用行事之間非所謂窈冥昏默者 語錄云云及夫

既竭吾才如此精專方見得夫子動容周旋無不中禮處皆是天理之流行卓然如此分曉又曰卓爾是聖人之大本立於此而酬酢萬變處通謂朱子以卓爾為大本之中盖仰鑽瞻忽顏子欲執其所謂中而未能及經夫子博約之誨而聖人大本之中如見於心目之間中庸曰立大本此立字即中庸立字博文即惟精約禮即惟一舜教禹以精一而後禹能執中夫子教顏子以博約而後顏子始見中特禹行道所謂中者是已發之

中顏子明道有立卓爾即是大本之中

大本之中是未發之中不知集註所謂日用行事語錄所謂動容周旋亦可謂之未發否且朱子但曰卓爾是聖人之大本不過謂卓爾是聖人酢酬萬變之本而已初不拘其為已發未發之同異也通者乃以之中二字續於大本之下然後足成大本之中四字則但可為未發不可為已發矣今觀通上文既以卓爾為大本之中下文即以為顏子欲執其所謂中而

未能又以為聖人大本之中如見於心目之間則大本之中是喜怒哀樂未發之前寂然不動之時初無端倪兆朕不知如何可執有何可見而通者如此說耶觀朱子中庸或問深以呂氏求之於喜怒哀樂未發之時與由空而後見夫中之說為非則知未發之中在己猶不可求見而執况謂顏子欲執聖人大本之中能見聖人大本之中乎至謂所立卓爾之立即中庸立大本之立亦似是而非蓋所謂大本者既已

不類則立之一字正不必強其同也若夫禹行道顏
明道故其所謂中有已發大本之不同者其以禹之
中為已發是固然矣顏子明道何為只明大本之中
而已發之中不之明耶凡此皆愚所未喻當闕之以
俟知者

有美玉於斯章 輯講待賈有兩說一讀賈為價一讀
賈為商賈之賈范氏前面云士之待禮猶玉之待賈是
以賈作價字讀後面又云伊尹太公無成湯文王則終

焉而已又似以賈作商賈之賈讀矣看來孔子無可無不可與伊尹不同時君苟能致敬盡禮無不為之用者恐不待湯文而後出

范說亦但以唯湯文為能致敬盡禮是以伊呂為之出耳若便以湯文為商賈而為伊呂之所待則伊呂不待湯文禮至而自為湯文出矣不待禮至而自為之出不幾於枉道銜玉乎哉今成湯有三聘之勤文王有渭濱之載伊呂唯待湯文乎抑亦待湯文之禮

至乎既曰待湯文禮至則范氏不枉道從人銜玉求售之言不為虛設而上文士之待禮猶玉之待價之言不為無照應矣范說上下文勢相應如此而雙峰不察真所謂理有未明而不盡乎人言之意者也至謂孔子與伊呂不同一節范氏引此特以發明聖賢不枉道銜玉之意爾伊呂固無枉道銜玉之理夫子雖無可無不可謂其枉道銜玉可乎不可乎此正與孟子答公孫丑有同之問相類其夫子與伊呂不同

處却不在此若時君苟能致敬盡禮夫子固無不為用之理然而轍環天下卒老于行終無致敬盡禮之時君又豈不以世無湯文之君而從歟又豈不以唯湯文之君為能致敬盡禮歟范氏之說吾無間然者矣

子欲居九夷章集註欲居之者亦乘桴浮海之意饒氏謂此有些不同那箇是嘆道之不行欲乘桴浮海或夷狄之君有能行其道者欲居九夷是見中國無君臣

上下使人厭之故欲居夷以避之爾

雙峰此說豈非欲分夷狄之有君不如諸夏之亡也
二句為此二章之旨耶但乘桴章猶有道不行三字
可據如此說可也此章自是門人記孔子欲居夷之
意下文或人答問又但以其陋而已不知厭中國無
上下之分意思雙峰於何處見得意者二章意只一
般彼曰道不行此則欲去中國而居夷便見諸夏之
亡意思不然聲名文物之邦聖人何為欲去之耶彼

曰浮于海此欲居九夷便見夷狄有君意思不然被髮左衽之俗聖人何意欲居之耶以此見集註引彼證此之為的當也

吾自衛反魯章發明引陳氏曰不及風者列國多不正之聲廟朝所不奏二南亦用之房中耳故正樂只言雅頌

按金氏攷證引王氏說力以桑間溱洧等詩為夫子所刪漢儒附會以足數者竊因陳氏此說推之恐王

說未可為不易之論也何則詩有六義風居其一謂之曰風則上之所以化下者不能皆正而無邪故下之所以從上者亦不能皆出於正而不流於邪矣六義之所以不能無風者正以見當時風化之得失為天下後世之勸戒如太史陳詩以觀民風者又豈容獨存其善而盡隱其惡耶但此等淫亂之詩則未必被之絃歌耳推此以例雅頌雅則亦有正變但雅之變者皆諷諭之辭為有異耳雅亦有變豈非以政有

廢興使之然歟雅之變者皆諷諭風之變者多淫邪
則以士大夫所作與塗歌里詠之人有不同故耳頌
則告於神明有正而無變固其理也合而言之則風
雅頌體製各有不同未嘗紊亂如此若曰多漢儒之
所附會則雅何為無淫邪之辭頌何為無錯雜之變
讀者攷焉可也詩自夫子刪後毛鄭以下至朱傳之
作無慮數十百家皆未嘗敢有明言其出於附會者
而王氏昌然言之聞者誰不錯愕然則且當為疑辭

而未可為決辭也不知識者以為然否

出則事公卿章集註說見第七篇然此則其事愈卑而意愈切矣通釋指發憤忘食之註而言耳全體至極則無纖悉之或遺純亦不已則無須臾之或失故其言如此纂疏輔氏謂與述而篇第二章之旨同

按全體至極純亦不已二句就女奚不曰處說以雙峰之意推之則全體是本憤樂二字言謂憤則全體皆憤而不參以樂樂則全體皆樂而不雜以憤也至

極二字本忘食忘憂而言謂發憤而至於忘食此憤之至極也樂而至於忘憂此樂之至極也純亦不已四字本不知老之將至一句而言謂非但一憤一樂而已憤而又樂樂矣復憤憤樂兩端循環無窮而不知年數之不足也若如通釋之說則不甚如此親切未知如何述而第二章却有何有於我哉一句豈集註所謂見於第七篇之說正指此句之說而言耶彼曰默而識學不厭誨不倦三者已非聖人之極致而

夫子猶不敢當以此章四事較之彼章三事則其事之愈卑可見事之愈卑如此而夫子亦不敢當則其意之愈切又可知矣輔說意殆如此姑並存之以俟知者

何有於我哉 攷證載語錄三說一以為此數事我皆無有一謂此數事外我復何有一說於我何有然皆未安熹今缺之金氏按味二則字及不敢字當從第二說人必有言夫子道德之全者而夫子不敢當曰云云如

此而已外此何能有於我哉

按此章集註曰說見第七篇蓋以第七篇亦有何有於我哉一句也彼章集註曰何有於我言何者能有於我也詳此正是主第一說意是至謙之辭然語錄以為三說皆未安而集註主此一說者則語錄未定集註已定可知如金氏說則是自任非自謙矣雖宛轉說作自謙之意終是費力聖人謙辭若此類者何限奚獨於此而致疑乎況中庸君子之道四明以所

求乎臣與子弟者以事君與父兄為未能則此所謂
事父兄公卿為何能有於我者正不足怪下文二句
亦不害其為愈謙固不可因下二句之為太謙併與
上二句皆說為自任之辭也

逝者如斯夫章 輯講集註似以逝者為道體之往某
看來者字指人而言斯字指川而言言人之勇往於道
者其如此川水乎下云不舍晝夜所以明上句取譬之
義言人之往水之往皆不舍晝夜也程子是發明聖人

言表之意非解此章文義也

按集註謂自此至終篇皆勉人進學不已之意則雙峰言此章逝字與下章往字同意之說似亦有理者指人斯指川存之以備一說可也但如饒說則如字只是如似之義看來集註不以此如字為如似之義者當更詳之且程子謂自漢以來儒者皆不識此意則是以獨識此意自任也恐不可謂其言為非解此章文意者不敢臆決姑志所疑以俟知者

集註道體之本然程子曰此道體也云云皆與道為體
攷證道體之本然此體是無形之體而物乃道之用
此道體也是有形之體而物乃為道之質與道為體猶
云與道做質也

按通釋以此道體也之體與前道體之本然體字作
一般說皆以為道之體段往來不窮如此唯以與道
為體之體作體質之體說而金氏乃以後二體字作
一樣說未知如何又按語錄雖不分三體字之同異

但每獨提起與道為體四字以為這體字說得粗只是形體之體又云道體只是道之骨子但言道體不明指為說那一句似無集註程子二道體言者豈通釋之分別有得於朱子之緒論耶

子謂顏淵章 叢說援何文定曰未見其止惜其不造於聖人之極也

按橫渠以為止是止於中語錄不取其說而於或問深取胡氏之說以吾止吾往訓進止之義與前後諸

章相類無以加矣叢說又何必引異說以亂之乎

苗而不秀章集註蓋學而不至於有成有如此者是以君子貴自勉也通引吳氏曰若再有則病於畫顏子則厄於年通謂上章是於顏子已死而追惜之此章是言學者幸不至如顏子之早死然學而不至於成者往往有如此

按通釋云不秀不實或疑其如顏子早夭之類聖人立言所以戒人之自畫其中道而廢者不必言也觀

此則吳氏以冉有為證可也以顏子為證可乎通者
又牽上章而強合於此類似附會要之正不必如此
說

法語巽言集註楊氏曰法言若孟子論王政之類是也
巽言若其論好貨好色之類是也語之而未達拒之而
未受猶之可也

發明謂全不從不
說者此等無可望

其或喻焉則尚庶幾

其能改繹矣從且說矣而不改繹焉則是終不改繹也

已發明此等深可
責輯釋亦引之

雖聖人其如之何哉

愚按發明似以其或喻焉以下六句皆是解經文說
不繹從不改之意者竊恐未然蓋語之而未達拒之
而不受是反言不從不說之意

語之字是體法言巽言字
說語之而未達拒之而

不受是體不
從不說意說

猶之可也以其今雖全未從說猶可望

其有時而從說則能改繹也其或喻焉則尚庶幾其
能改繹矣正是應猶之可也之意而言其若一旦有

從說之時則猶可望其能改繹也

喻字即體
從說字說

自從且

說矣之下方是說說不繹從不改之意不知同志以

為然否

可與共學章集註程子曰漢儒以反經合道為權故有
權變權術之論皆非也權只是經也朱子謂云云權與
經亦當有辯語錄權雖異乎經而實亦經也且如冬
月合著綿向火此是經忽然一日暖則亦須使扇當風
此便是權伊川謂權只是經意亦如此但說經字太重
若偏了漢儒反經合道之說却說得經權兩字分曉他
說權遂謂反經一向於變詐則非矣又曰程子說漢儒

之誤固是如此要之反經合道一句細思之亦通繞說權便是變了那箇經雖謂之反可也然須是反那經却不悖於道雖與經不同而其道則一

反經合道之言程子非之朱子既以為非之是矣而又每於反經合道之言若有取之之意何也蓋經是萬世常行之道既是經則不可反反經則悖於道矣如何又能合道故以反經為權則必流於變詐此程子所以不得不非之也然事有常變故處事不可無

經權經是處常之道權是處變之道處常處變用各不同此權與經所以當有辯也而程子以為權只是經則是以處變之道即為處常之道矣不幾於無辯乎此朱子所以又不能無疑於其言也竊意事之常則經可行事之變則反乎經而經不可行矣經不可行則濟之以權然則非權之反經也事之變者反乎經爾漢儒不以事變之反經而以行權為反經是不以病為病而以論證命方為病也不亦誤乎飲食所

以養生藥石所以伐病用各不同養生之譬則經伐
病之譬則權也程子以為權只是經是以伐病與養
生為無別也學者不幾於不知所辯乎若以伐病亦
所以為養生計則程子之言固是若以伐病與養生
用各不同而觀則程子之言誠有所未備者朱子安
得不補其所未備乎

集註於子在川上章謂自此至終篇皆勉人進學不已
之辭通於三軍可奪帥章謂自逝川以下至此十章

勉人為學然學先立志有志則進必如川流之不已無志則止必如為山之不成 輔氏於末章謂自子在川上章已後皆勉人進學之意此章雖不明言其所謂是亦勉人進學之意而已

按集註之言如此而通乃於三軍奪帥章如此說故於末章不引輔說蓋不盡以集註為然而又不敢明言之也詳集註意但謂諸章皆勉人進學而已未嘗必其辭之同文之類而意之相承也通者則自逝川

章以後至於奪帥章章皆說從逝舍進止上去以見辭同文類而意相承之例自此以後逝舍等字無復可援遂皆不及勉學之意然熟翫此後五章之旨又何莫非勉學之言哉

鄉黨

首章便便言集註詳問極言 發明在廟詳問在朝極言 輯釋亦引之

詳問極言通釋便使之義則在廟在朝皆當如此可

知發明分而言之豈非本入太廟每事問之意而為此說乎然彼特始仕而入則然耳若每入每問則非誠心矣聖人固無在廟則但問無言在朝則但言無問之理經註之旨似不如此

使擯章左右手 集成輔氏謂如賓自南而北則居東者在賓之右而賓在其左故用左手以揖賓居西者在賓之左而賓在其右故用右手以揖賓如此然後兩相向也

擯所以傳言或傳主言以達賓或傳賓言以達主故
或左或右其手以揖其所與同為擯者使之傳言出
入以次致之賓主而已其制具於禮經注疏者甚詳
集註及語錄集疏紀聞言之已備輔氏專主揖賓之說
未知所據姑志之以俟知者

入公門章立不中門集註中門中於門也謂當棖闌之
間君出入處也 或問疏門中有闌兩旁有棖中門謂
棖闌之中然則門之左右扉各有中所謂闔門左扉立

于其中是也 集成胡氏云中門右扉之中也 輯講
饒氏謂東西兩扉各有中君出入則皆由左出則以東
扉為左入則以西扉為左士大夫則皆由右出以闌西
為右入以闌東為右 輯釋兼引或問及饒說

按語錄或問皆有闌左扉之說而胡氏又直以為右
扉之中今雙峰以為二扉出入互為左右則是二扉
皆開無闌左之說也然朱子據䟽而言不應有誤豈
䟽之說必如雙峰之言而後備耶疑不敢質姑闕之

以俟知者

公宮之門左右自有定如左祖右社之類決不因入出入而互為左右之異也

執圭章集註晁氏曰孔子定公九年仕魯至十三年適齊其間絕無朝聘往來之事疑使擯執圭兩條但孔子嘗言其禮當如此爾輯講饒氏謂無朝聘往來豈史冊記載亦有不盡者耶又謂史記孔子以定十四年去魯適衛晁氏十三年適齊之說不知何據通馮氏謂據左氏史遷所載恐不無軼事是書出於門人之親記烏得而疑之

饒氏據史記疑晁氏十三年適齊之說與朱子序說有合可備一說馮氏記載軼事之疑亦雙峰之緒論恐或有之但春秋魯史孔子所修果有其事固不當軼亦不當削恐不當疑史冊而意門人親記之必有也更詳之

君子不以紺緌飾章當暑袵絺綌集註葛之精者曰絺
麤者曰綌 通馮氏謂絺文從希言其細也綌文從浴
省言出浴所被乃其麤也舜之作服絺居其一蓋桑土

未盡蠶此其貢於島夷之卉服故以為貴至周而文矣
故當暑但可為褻服

馮氏此等辯別皆無益於經註之旨通者采之于編
濫矣况又未必是乎以締為作服之一此說先儒既
所不取則但當以鄭氏為正何必索隱求奇以眩學
者攷之書締繡之締鄭氏讀為黼紕也

紕音秩
終也

紕以

為繡也黼諸凡反鍼縷所縫之義引為締綌之證似

欠詳審周禮司服

春官
上

五冕中有希冕希鄭氏讀為

締或作黻字之誤也豈馮氏以此故而致誤歟然其字之音義皆與書締繡之締無異又却正是周制今曰至周但為褻服則其說又自相牴牾殊不可曉又鹽締正是青州所貢今曰貢於島夷亦欠詳審卉服葛特其一耳若所論締綌綌綌之義似亦難信然非大義所關又何足辯

無所不佩 攷證云集註觶礪之屬古之君子必佩玉恐不止觶礪若觶礪則止於用器非文飾也

按集註上文有君子無故玉不去身二句矣豈攷證偶失於檢點耶何其言之不可曉也

吉月集註月朔也孔子在魯致仕時如此 通引季氏云周官云正月之吉又云月吉讀邦法皆因吉禮以別凶軍賓嘉故謂吉月也又引吳氏云吉月正月也凡事先吉而後凶故謂正月為吉月輯釋亦引二說

吉月集註以為月朔則雖致仕一年猶十二朝若以為正月則歲止一朝而已毋乃太簡乎

衣服之制一節下集註取蘇氏曰此孔子遺書雜記曲禮非特孔子事也 發明前註君子謂孔子此又謂非

特孔子事愚謂孟子曰君子之危於陳蔡君子即孔子吉月之朝右袂之短豈亦雜記曲禮乎 輯釋亦引之

或問已疑及此矣其所以又取蘇氏說者正是疑不敢質之意况曰雜記曲禮雜之一字何嘗以為皆曲禮事乎曰非特孔子事非特二字又何嘗以為皆不是孔子事乎發明不必致疑可也

齊必變食章 通引馮氏謂上半章衣服也下半章飲食也故記者係之衣服飲食之間以從其類云 通謂前一節兼用不字必字此一節純用必字後一節純用不字必如是則合乎理不如是則不徇乎欲

按通釋引或曰齊必有明衣布并所脫寢衣一簡當屬上章齊必變食居必遷坐當屬下章則上章言衣服下章言飲食似有倫理當存之竊意如或說則衣服飲食雖得各從其類然謹齊正意則判而不續要

不若自為一章之善今觀馮說正是祖述或說而少
變之然自為一章既可以全謹齊之正意而首尾又
不害其為以類相從似於或說為優但後半章有居
必遷坐一句則又不純乎飲食矣要之正意只是謹
齊自為一章雖不必言前後以類相從亦可也通者
必字不字之推似矣至謂後章純用不字而後章之
末不免有兩必字其意與馮說此下半章言飲食而
不純乎飲食者正相類恐皆未得為切當也

末章山梁雌雉 輯講饒氏謂山梁是山之高處雌雉
陰類而居山梁猶小人而在高位得行其志時實使之
然也夫子因見而有所感故發此嘆子路不達而供之
夫子以其非已意故不食而起上言色舉翔集以喻君
子之去就此語小人之得時故門人以類記云

集註以飲啄得時釋時哉之義則時之義係於雉雙
峰以小人得志時使之然言之則時為時世之時與
雉不相闕矣夫見雉於山梁而以時世哉時世哉之

言承之聖人之言未有如此突兀而新巧者恐不若從集註之為順也况小人固不當在高位雉之飛啄於山梁亦何分於雌雉哉至以共為供具之供固若可通然子路聖門高弟不應如此之不達也朱子備三說而又闕其疑良以此夫

發明色斯舉矣翔而後集即謂夫子見此雌雉如此曰此山橋之雌雉其見幾而舉翔審而集時哉時哉蓋謂時當飛而飛時當下而下皆得其時也子路不悟以為

時物而取雉供之夫子不食三嗅而起苟移山梁雌雉
四字冠於此章之首則辭順而意尤明云後二說可略
輯釋亦引之

發明此說自起首至皆得其時也可備一說自子路
不悟以下恐未為的當蓋若略後二說則共但為供
具之義雖可強通然子路不悟毋乃甚乎前段之辯
已詳無可言者但發明所說又不同於饒氏疑不能
闕啄啄爭鳴鳥之雌雄誰能知之嗚呼歎矣

四書管窺卷三